

晚晴移詩匯

晚晴謔詩匯卷八十五目錄

明瑞 二首

奎林 三首

李世傑 四首

託庸 二首

莽鵠立 二首

李宏 一首

鄂忻 二首

陳樹著 二首

李秉禮 十六首

汪棣 一首

汪啟淑 二首

金德輿 一首

卓奇圖 三首

傅澤洪 一首

張恂 四首

胡期頤 一首

張符升 二首

潘尙仁 六首

鄭王臣 三首

張邦柱 三首

邱中玉 一首

白衣保 四首

汪松 三首

高珩 三首

陸鍾輝 一首

佟鉞 一首

陳長鈞 一首

程夢湘 四首

王道 一首

吳貽誠 三首

周彥會 二首

孫起柟 三首

彭雲鴻 七首

汪軻 七首

胡鉞 五首

張如焯 一首

張開東 二首

金忠淳 一首

曹煥 一首

晚晴移詩匯卷八十五

徐世昌

明瑞字筠亭滿洲旗人官至雲貴總督封一等誠嘉毅
勇公諡果烈有北窗吟藁

詩話果烈征緬甸孤軍深入陷敵力戰卒以身殉風
工吟詠嘗有送弟使烏斯藏句云寒分百戰袍渴共
一刀血忠義奮發意存辭表

九日

何處登高郭隗臺望中樓閣更崔嵬晴郊霜隼迎風疾渤
海長鯨撥浪迴騷客興隨秋水遠故人書報菊花開莫評
燕趙千年事陵谷纍纍實可哀

澄江

對面金焦好放眸春江重渡蹇誰留一天風色歸颿飽萬

頃煙波畫槩柔龍虎氣衰堪飲馬鯨鯢浪息敢吞舟太平
功業超千古天險何嘗是帝州

奎林字瑤圃滿州旗人官至成都將軍封一等武勇公

兼一等男諡武毅有幽棲堂吟藁

詩話武毅勇冠三軍而說禮敦詩雍容儒雅素嗜梅
村詩背誦如流水故其所作詩辭藻宏富音節高亮
猶有婁東餘響如詠古云秦庭一哭終存楚越國三
軍竟招吳惜別云對面易成三里霧離心先託四絃
秋皆其佳句爲
吳南野所稱

晚眺

絕塞居閒暫息機晚雲看盡攬征衣夕陽下地羣鴉集風
色橫天一隼歸壯歲自傷塵鬢改故人漸覺尺書稀酒酣
獨立蒼茫裏何處高鴻避繳飛

聞蛩

殊方冷暝候難同入夜蟲吟初夏中孤客莫悲秋意早玉
關原自阻春風

自伊犁馳赴金川軍營遙別素村

萬里遙相別天涯更遠行百年殊夢幻一劍是平生熟慣
從軍樂渾忘兒女情無勞念游子身世久風旌

李世傑字漢三一字雲巖黔西人官至兵部尙書加太

子太保諡恭勤有家山紀事詩南征草

詩話恭勤自少以父官兩淮鹽大使遂入資爲巡檢
悉任州郡以廉能盡職爲陳文恭阿文成所識拔游
膺疆寄內擢兵部尙書高宗屢欲以爲大學士尼
之者言其不由科目例不可官內閣遂中止洪北江
視學貴州嘗道黔西公先以病告歸足疾不得行兩
僕扶掖出迓於道左北江亟下輿揖曰何敢勞公公
笑曰非迎學使乃迎不徇情面之賢者耳

過飛龍關

羃歷春陰釀曉寒
雨餘嵐翠撲征鞍
盤旋馬踏層雲上
淡沱峯如入畫看
村舍炊煙浮碧穗
溪橋亂石激清湍
登臨已覺行非易
負重邊氓食力難

清溪縣

踏破層雲下碧霄
沈黎煙景晚蕭蕭
山分契道蠻天迥
路向烏斯異國遙
荒邑衙齋供館舍
民居板屋耐飄搖
無眠一夜風聲急
似聽錢塘八月潮

伏龍寺

狹棧緣溪曲折升
鐘聲遙度白雲層
懸崖凍瀑噴如雨
雪磴陰風勁有棱
廚下細泉隨竹遠
巖前片月共窗憑
莫愁天險難飛越
有路應堪拾級登

六月過山根站遇雨

雪磴陰風砭骨寒千尋積素聳雲端寫生擬倩傅神手畫
向炎方六月看

託庸字師健號瞻園滿洲旗人官至吏部尚書諡誠愨
有瞻園詩鈔

瞻園月下作

不堪一片月仍傍晚花明當此初秋夜偏多弔古情鍾山
餘夜燒鐵甕走江聲捫首見霜雪皇然老大驚

憶山莊舊居

一徑深林古岸斜疏籬曲院足煙霞竹根籜解黃岡筍雲
液香烹顧渚茶繞砌清泉流石髓隔簾寒月照梅花何時
了卻風塵事短杖歸閒野老家

莽鵠立字樹本號卓然滿洲旗人官至都統諡勤敏

大清開詩爲王司馬賦

白塔山前水向東唐渠疏浚總無功王公學得蘇公法一
道長隄築浪中

巧奪天工一筧橫高低喜聽叱牛聲亭臺開壩同唐漢不
愧標題號大清

李宏字濟夫號湛亭漢軍旗人官至河東河道總督有
戢思堂詩集

題素園圖送王二鏡巖歸里

君自會稽來挹此東南美磊節竹之操虛中竹之理君本
素心人合與此君倚今復灑然歸峭帆問煙水如遇會稽
竹道我念無已

鄂忻字怡雲滿洲旗人官至工部侍郎有清虛齋集

詩話怡雲爲文端第五子嘗出駐和闐賦和
闐四景詩從容閒雅不爲邊塞行役之辭

登祕魔崖

山深寂人語但聞野鵲喧鳥道橫虛空孤雲若可捫斷崖
石室祕靈怪潭中水落蒼龍奔長風浩浩吹我身飄然直
上臨天門下視城郭漲紅塵大呼仙人鬼谷子相與結伴
登崑崙

和闐吟

卻喜桑麻地經年無客過大都春雨少惟有夏雲多秋日
光偏潔春夏常多風霧至秋後始晴明冬時氣亦和冬日和暝過於內地葫蘆爭取
水來往汲清波此地無井回人咸

陳樹著字學田湘潭人蔭生歷官鴻臚寺卿

詩話學田恪勤子初以任子官西曹數歷中外其後
刑部火文籍皆儘命嘗官西曹者追錄以進學田所

述最多人
稱其疆記

燕中秋感

幽州秋意早客望獨登臺斜日連雲去涼風逐雁來當歸
非鄭重久立亦遲迴已自逢蕭瑟砧聲莫漫催

金華題砌下小松

何年離澗底傍砌亦成陰未有棟梁具空含霜雪心牆花
低欲壓簷溜暗相侵不作蚪龍隱華嵩山自深

李秉禮字敬之號松圃臨川人官刑部郎中有韋廬詩

內集外集

詩話松圃辨香左司同時如秦小峴李子喬皆學韋
然頗旁涉諸家惟松圃墨守蘇州終老不易故變化
不如秦李而精微過之其善者幾如空中之音相中
之色人皆聞見難可捉摸通體洗練都無率草惟七
言稍弱生平與子喬最契內集皆經點定子喬歿凡
未經點定者則編入外集子喬亦極推服至欲躋於

朱王之上則
未晚過情耳

湘江曉發

軋軋鳴柔艣行行感暮秋
曉雞催短夢殘月在孤舟
炎嶽雲中出碧湘天外流
一聲南去雁惆悵故園愁

夜雨

涼風吹落葉秋氣正蕭森
一夜孤篷雨懷人湘水深
遙天征雁斷野寺曉鐘沈
料得重雲外蒼蒼入桂林

早發襄陽

雲樹渺無際江流日夜長
猿聲初到枕客夢未離鄉
古戍吹殘角孤城接大荒
鹿門何處是回首但茫茫

夏夜池上納涼

披襟坐池上日夕澹忘歸
明月忽在水荷香生我衣
夜涼

羣動息風定遠鐘微因念塵中客翛然似此稀

送人還鄉

送客歸南浦關山滿別愁愁心似春水處處逐君舟

南樓

南樓雨初歇風溜響潺潺一水到門靜兩山終日閒雲連
村樹暝鳥帶夕陽還頓覺煩襟滌蕭然濠濮間

雪霽登樓

茲晨雪初霽虛室有餘閒登樓一以眺萬象皆澄鮮白日
照荒野豁然開遠山歷歷辨林麓稍稍鳴幽泉斟酌情彌
殷俯仰神屢遷驚盪自北來孤鳥沒寒煙歸雲將暝色消
散惟空天長歌佇明月人境兩蕭然

同子喬棲霞寺待月作

鐘魚寂無響涼秋在高樹濛濛煙未收稍稍月初吐林巒互明晦階除已流素旣愜平生歡復茲清景遇幽賞殊未已芒履霑微露誰爲後來者還當識此趣

玩珠洞燕集送別子喬之鎮安

下瞰無底潭上壓千尋壁石柱忽倒垂一洞破青碧山空人語響徑古苔痕積旣瞻米老像還求范公蹟曠懷耿至今風流緬似昔濁醪共斟酌雜坐雲根石迴瞻隔浦帆隱隱沒沙磧水風時吹衣斜陽澹將夕偶涉已浩浩欲去仍惻惻良會不可常况值遠行客

曉行

雞鳴呼僕起征鐸驛門前宿露方霑草數星猶在天漸分山下路時聽寺旁泉卻羨經過處村村掩戶眠

過吳木虛寓齋

憐君棲息處地僻少人尋
野水帶茅屋遠風生竹林
鳥聲臨磻響花氣隔簾深
好是關情甚無時卻廢吟

游鐵佛寺華景洞

雨霽山色佳延眺孤興發
招提倚雲根境寂悟禪悅
不逢巖居僧惟見鐵鑄佛
空翠撲衣衿靈異祕石窟
乳竇極深黝仄徑盤曲折
苔滑不留趾蹙蹙屢防蹶
一綫漏天光峭壁忽中裂
竦身出峯脊下視何斗絕
恍疑魂夢醒頓覺心目豁
摩挲蒼石棱中有唐宋碣
曾經幾劫火古字半磨滅
暝色蒼然來去鳥望中沒
竚立更夷猶長歌懷往昔

季壽无咎復園連日游桂林諸勝復園作圖季壽无咎各繫以詩裝成卷軸示余爲作是詩

老眼揩摩眩青碧溼翠浮嵐生几席閉門卻掃已逾旬忽
對此圖神奕奕諸君夙有煙霞癖策杖欲窮猿鳥迹躡雲
穿洞不知險嶺外奇峯恣探厯歸來逸興猶遄飛千巖萬
壑填胸臆槎牙奇詭鬱不得吐得雲煙挂齋壁我今讀畫
兼讀詩疑有山靈暗中覲卧游便可學宗生不須更著謝
公屐

重游疊綵山風洞坐秀野亭眺望

好山如好友悵焉風雨隔朝來喜新晴還復理輕策蒼翠
森到眼一笑獲良覲攀蘿躡危磴捫壁搜古跡有洞忽中
穿巨靈何代擘凜然毛髮竦天風吹不息虛亭納萬象曠
覽浩無極日墮林莽間村墟明厯厯閒雲已歸岫倦鳥亦
斂翼延佇未能去孤吟坐成夕

白龍洞

洞中石壁上有唐李渤留別南溪詩云常歎

春泉去不回我今此去更難來欲知別後留
情處手種巖花次第開詩
極悽惋覽之慨然有作

白龍已飛去千載洞長陰題壁人何在巖花開至今我來
訪前跡祇覺氣蕭森泉響不知處泠泠清到心

月夜池上

商飆入梧桐涼月侵虛幌西齋掩書坐落葉時一響攬衣
出前楹信步成獨往圓水涵空淨孤煙逗叢莽梵鐘何處
來悠然淡塵想

汪棣字韡懷號對琴歛縣人官刑部員外郎有持雅堂
集

寄春稿

風露迎階欲二更翦燈獨客總關情西山爽氣曾經眼東

國儒生偶識名中夜忽思箋蠹賦隔鄰偏覺僻驢鳴棗林
桑泊多秋色輸與歸程緩轡行

汪啟淑字初菴號秀峯歙縣人官兵部主事有漆園吟

甌江游草

詩話初菴家有縣潭山館極池臺水竹之勝博收載
籍乾隆間開四庫館以所藏善本獻與武林振綺堂
汪氏相埒賜書通德
並爲東南文獻世家

桐江曉發

篙師蓐食興振舵天猶昧橫空白雨來瀟瀟響篷背遙指
桐君廬雲深迷所在石尤挾銀濤怒激孤舟退起看山作
圍坐愛鷗成隊江柳裊繁絲岸草拖輕黛眠餐困客途林
泉發勝概朗誦謝客詩清游儻能逮

南亭

雨餘景物幽俯仰得清曠南亭一登臨頓覺吟懷暢澄江
作帶環翠岫開屏障于時屆朱明平疇翻碧浪候鳥有佳
音流雲幻奇狀好風遞漁歌落日聞樵唱平生厭浮華山
林秉微尙何當釋塵累高步追禽尙

金德輿字雲莊號鄂巖桐鄉人官刑部主事有桐華館
吟藁

響鈴墳

南渡諸陵草木空一抔猶得瘞蒿蓬荒邱白骨魂休怨去
國青衣恨未窮淚盡銅僊非漢闕歌殘玉樹憶陳宮夜烏
嘯敬秋蟲死剩有鈴聲咽曉風

卓奇圖字聖肇號誤菴滿洲旗人諸生官戶部筆帖式

詩話乾隆初誤菴與峻德慎齋保祿兩村胡星阿紫
鋒同官戶曹掾相唱和嘗輯白山詩存未及成書遽

以疾卒誤巷詩整嚴精到嘗爲友題扇云野水平沙
落日遙半山紅樹影蕭條酒樓人倚孤尊坐看我騎
驢過板橋紀曉嵐稱其遙
情高韻脩然有塵外之致

大通橋卽景

夾岸垂楊帶雨青踏歌人訪濯纓亭幾行睡鳴隨波注流
到橋邊夢未醒

八里橋贈別

旗亭重敘別情逼古河梁遠水連秋色孤帆背夕陽含悽
辭故侶帶醉入他鄉不盡浮雲意先教寄短章

客過

客過山窗索煮茶焚香坐石話桑麻閒雲飛出嵐光瘦倦
鶴歸來樹影斜老我半生因楮葉留君十日對桃花量晴
較雨饒佳興何事勞勞問酒家

傅澤洪字育菴滿州旗人歷官江南淮揚道副使

詩話育菴撰行水金鑑緒括古今臚陳利病書切於實用足與桑鄴並傳

水西煙雨亭

雨霽日復佳乘興出東郭漫擬桃源舟曲折上高閣豁然俯蒼茫一葉任飄泊山城煙靄中遠峯翠欲落驚鼠竄古松清言向修籜緬彼詩中仙九原其可作返照挂丹楓秋風入寥廓遠公期再來不言心已諾

張宏字西潭漢軍旗人監生歷官湖南驛傳鹽法道有

買桐軒集

唐顏山雨後晚眺

倚眺唐顏閣晴光四野生殘雲留樹溼斜日射山明江色連天色歌聲雜艣聲徘徊魚磬裏新月向人清

山居贈張石帆處士

數椽空谷裏地迴絕塵氛採藥迷歸路看山路亂雲杯傾
松上露飯煮水中芹不識人間事悠游麋鹿羣

姑蘇懷古

金閭繫舫獨探奇虎阜登臨落照時天外有湖歸范蠡山
中無客拜要離杜鵑紅染貞孃墓楊柳愁深伍相祠響屨
廊中人化土尙留新月認蛾眉

泊表誠寺

一名蔦蘿寺俗傳明太祖戰陳友諒被
困絕糧老僧進食卽位後遂勅建焉

蔦蘿寺外草蕭蕭流水門前晝夜號苔蝕殘碑封瓦礫煙
埋古殿剩松濤一杯麥飯同光武三尺銅花類漢高莫歎
此間荆棘滿鐘山陵上亦蓬蒿

胡期頤字永叔武陵人官江西臨江知府有南湖居士

集

蔣叔程過訪余以病未面復見寄一律次韻答之

自信嵇康七不堪殘年決計返江南屋梁落月添離思天際飛鴻渺去函羨子才如千里馬笑予身似再眠蠶攜來佳句渾忘病更擬尋山看曉嵐

張符升字子吉蕭縣人歷官柳州知府有蘇門山人詩
秋日蒹葭莊漫賦

九月霜初飛清光下寒葉天迴蠲俗氛秋山青見骨微風吹林端蒲葦聲獵獵迢迢遠水明隱隱虛舟涉自分塵緣
疏渺與外人接

桐西

十年不記桐西路瘦馬閒吟入莽蒼幾葉破帆隨短岸數

株殘柳曳新霜田園蕪盡門猶設骨肉情多語易長塵盈
勞人來又去竹窗尊酒兩茫茫

潘尙仁字似山號南林烏程人歷官錦州知府有蘇門

山客詩鈔

沈歸愚曰吳興潘南林先生少喜爲詩蒞官後亦不廢詩由吳陵判官至中州別駕司馬以及出守錦州所至如春風著物民受披拂欣欣有長養意因得於靜治之餘寄興於詠

平山堂

棟梁虛敞麗高臺縱目秋光四望開平楚冷煙依檻過遠
山晴影入窗來風流閱世成千古景物興懷更一回佳句
自應推往昔含毫不覺愧非才

怡雲別業雜詠

榆柳團團接翠微野人心事莫相違白雲從此閒舒卷不

許澶漫出岫飛

茅屋蕭疎八九間雙扉終日向溪閒何須更上清暉閣自有高樓看好山

低築垣牆小界鄰野蜂閒蝶往來頻最憐山月當頭起比校城中早近人

密竹參差欲漲天秋來洗得最堪憐自家取足漁竿用更與溪翁備織筌

一派潺湲夢寐餘百門泉水護幽居耳中俗物應流盡管取襟懷並太虛

鄭王臣字慎人號蘭陔莆田人拔貢歷官蘭州知府有

蘭社詩彙

詩話蘭陔嘗選莆風清籟集自唐宋至國朝一千九百餘家次爲六十卷蒐羅勤至一州文獻足徵矣

秋雨

澤國多秋雨湖嵐結夕陰
溼螢黏壞壁飢鳥落疎林
浙瀝蕉聲碎空濛樹影沈
移書防屋漏蕭索動微吟

過江如村

南國佳人住水村春潮寒碧浸籬根
蘼蕪猶作裙腰色一道青青直到門

金棗銀蠶葬故鄉梅花猶繞墓門香
馬嵬原上生秋草紅粉成灰賸錦囊

張邦柱字蔚齋號芷鄉禮陵人貢生
歷官思州知府有嘯松樓詩集

謁柳公祠

竄迹湘濱十載逾天將華藻闢靈區
從教後世更稱聖祠

榜稱不及先生舊號愚入記風流泉石潤四家文字鬼神
扶塵顏未敢修長跪古座衣冠冷笑吾

白日悲歌荔子丹愚溪橋下水漫漫柳公巖古長留姓司
馬塘今尙紀官遺廟兩州尸祝在穹碑一片墨痕殘清時
無復徵蛇乳閭左恬熙賦役寬

人日

殘雪初消古市傍一鞭款款去來忙春交水上三分暝風
落梅邊幾瓣香顛倒酒人敲阜帽淺深油壁簇紅妝天公
解爲佳辰霽不放微雲碧字藏

邱中玉字朗如一字璞齋黔陽人官至浙江平陽鎮總

兵

還家偶述

僕僕征途馬上身廿年鄉夢繫風塵歸來偶值登高節喜
極還爲太古民泉石留題多老輩園林歷劫憶先人兒童
父老團欒會話到更深不厭貧

白衣保字命之號鶴亭滿洲旗人官荊州參領

山僧吟贈青眉道人

夕陽落幽澗風泉鳴疏林泉聲瀉澗影不亂山僧心山僧
久面壁坐處寒雲深哀猿與孤鶴相伴山僧吟

春愁

不解因何事當春倍黯然野棠孤冢月芳草暮村煙許國
心猶壯懷人夢可憐無聊頻喚酒費盡買花錢

渡黃河

擊楫金隄下中流望眼開水從天上落人自日邊來廢壘

寒煙白荒墩畫角哀夷門知不遠弔古獨徘徊

秋日晚歸

林外紅霞拂女牆征衫初換愛新涼板橋柳色經殘兩山
店鴉聲報夕陽久客不妨甘寂寞微官何必卜行藏蕭蕭
鞍馬秋風裏又見梧桐幾葉黃

汪松字蒼巖漢軍旗人官佐領有早閒堂詩集

山海關

關勢橫吞海波光直接天帆飛孤嶼外城鎖亂山顛俯瞰
魚龍戲平臨日月懸高樓據形勝千里控幽燕

秋夜

牢落深秋候匡牀坐復眠一聲遠歸雁萬里欲寒天隔院
碁何急虛窗月自圓不堪思往事敲枕夜如年

觀獵

鳥道盤盤入碧隈
羊腸河曲水滌洞
蕃王似雁隨
秋至塞馬如雲
壓地來萬乘
旌旗驅虎豹
六軍戈戟擁
風雷微臣
得覩天王狩
愧乏長楊獻
賦才

高珣字乘亭漢軍旗人官湖州同知有茗谿宦游草

雨中望金山

鐘梵徹雲霄
南風度清響
客夢忽驚迴
清興共潮長
披裘犯曉寒
掀篷暢奇賞
煙雨灑空江
迷濛合霄壤
中有玉嶙峋
銀濤正搖盪
金碧晃千層
浮圖兀百丈
恍如三神峯
縹緲絕來往
酌酒祝馮夷
請放江天朗
風姨迴鸞車
雨師撒雲仗
碧波細於鱗
晴煙送烏榜
振衣北固樓
俾我襟懷爽

題轉菴上人小照

少小親戎馬征衣血濺紅心灰百戰後身老萬山中詩思
滿幽壑靈光徹曉鐘十年禪榻畔前事悟真空

七尺枯藤杖閒身挂白雲自稱老禪客誰識故將軍世外
漁樵侶山中麋鹿羣勞生慚俗吏展卷挹清芬

陸鍾輝字南圻號淳川江都人官南陽同知有放鳴亭
小橐

霍家橋道中

江村梅有信趁煥喜追尋沙輭小車疾草枯黃犢侵斷橋
橫野水微日淡荒林我是曾來客廊腰記淺深

佟鉞字秉虔號鈍三漢軍旗人官葭州知州有爾爾齋
詩存

羅浮

十載羅浮夢新秋問海門雲從雙澗合翠擁一峯尊大藥
留丹竈長生賸水源妻梅林處士歸老定何村

陳長鈞字殿元號梅岑武陵人優貢歷官宣威知州有
柱山詩存

寓夜

沅水三千路已賒賈胡留滯漫興嗟半間瓜舍殘書滿八
尺筠牀布被斜月似伴人窺酒盞蟲如對客語窗紗檻雲
已散齋鐘寂惆悵鄉思未有涯

程夢湘字荆南號衡帆丹徒人拔貢官清泉知縣有松

寥山館集

詩話王夢樓作京口五詩人傳以衡帆與余江干鮑
海門張石帆李琴夫之詩合刻之衡帆有句云碧澗
松吟猿梵冷香廚花
掃鶴糧空爲時傳誦

西泚夜行

日夕湖水清蒼茫月明裏水清不受月月出見湖底遙山
隱鱗鱗微波空瀾瀾星星漁火生杳杳拏音起開簾向空
綠一碧見千里空明溯流光沿緣擷蘭芷盈盈杳難卽臨
風懷彼美

西溪水宿

殘月下柁樓鳴禽破幽寐露稀天益澄水遠星初墜遲明
啟篷窗峭寒襲布被時有微風來蘆葦響清吹水花不知
名輕盈送香氣渺矣孤客懷於焉發遐思

南樓對月

孤鴻聲可數黃葉落無多復此南樓月離思渺若何煙開
溧陽樹山接貢湖波明發歸帆遠乘風好放歌

送王夢樓之揚州

金簡紛披會百靈，魚龍曾識使臣星。
天迴滄海千重碧，夢破齊州九點青。
未許游仙求大藥，依然浪迹等飄萍。
孤篷小作蕪城別，臥穩江湖帶月聽。

王道字直夫，漳浦人。官金山知縣，有江湖閒吟。

解嘲

飄飄如漆轉輝光，將老曾無卻老方。
執藝直須龜手藥，保身莫倚麝脐香。
強尋佳句吟常撚，每發狂言怒益張。
謾說太元原可擬，鐫銘潑墨總師揚。

吳貽誠字荃石，一字竹心，桐城人。歷官新河知縣，有靜者居詩集。

檢書吟

日出檢羣書幽窗送新翠中懷偶不平展卷風花墜西漢
尚文章東漢尚節義橫議遭焚坑激揚天所忌出師前後
心侃侃追謨誓典午快雄談南朝工藻績宣公奏疏陳諫
果餘真味詩史少陵翁謳歌紀時事韓起八代衰造語開
矐翳歐陽復曾王雄豪美孰繼三蘇思湧泉落墨潮海至
道學尊紫陽韋編尼父志文山正氣歌一字千秋淚厥後
叶宮商梁園矜紙貴雞林帖括佳假借先民意枉費子衿
才何殊優孟戲勞勞讀律家繁曠久師吏刀筆發奇葩他
年公輔器吁嗟魯一儒可以封經笥

秣陵灌花奴

灌花奴老且禿千里來依瀛海曲巧作河陽爛漫春羞爲
白下紀綱僕學圃當年事已空朝華夕秀感秋風主人節

鉞何時謝平泉策策鳴孤桐草茅三徑雜荃蕙傳舍閔田
榛莽封我本秦淮舊花叟花殘木賸身安容知君惜花兼
感舊願守君家花數叢予聞太息還深省往事浮雲催短
景憶昔書生出塞時風霜朔漠圭稜凜艱難磊落世誰知
貂敝硯穿巾笥冷際遇軍中祇白衣厯官清要聲名迴三
十年來特達知開府勳名重行省種花能迴天地春要使
奇溫生萬井畿輔家刊墮淚碑祇今父老猶悲哽碌碌灌
花奴家藏十稜書願取橐駝栽樹意甘棠徧植萬千株

重陽遷舍初成小飲有感

瀛海無山尙有樓不登高亦快高秋催租吏少空堂靜種
菊人來小院幽歸鳥片雲迴屋角落帆殘雨下牆頭官閒
始識持螯樂半載蹉跎一醉酬

周彥曾字文羽號半軒丹陽人貢生官太和教諭有文

餘小技

詩話文初以明經入成均二十年始得學博吉渭厓
研經堂集有題半軒詩云向平婚嫁已粗完八十年
華抱鏡看好置詩人巖石裏尋幽問壑老垂竿小園
賦就庚蘭成插槩編離過一生需改選人垂廿載冷
官何似半軒清

過友人山居卽景

幽情與物遠小飲傍山柯幾折入松徑短牆開竹門吟將
梅共瘦人對鳥忘言風颺餘花落茶煙繞榻昏

沈山

小山石片望嗟峨落日漁樵起嘯歌花覆層巒春氣暝松
鳴幽澗夜聲多當年有客耽邱壑此日何人卧薜蘿我亦
夢中曾一到他時可許結茅過

孫起柎字幼梅一字蘅皋新化人諸生官潛江教諭有
經訓堂詩集

石溪山房

巖石無名譽棲遲谷口耕鋤犁春雨暗機杼夜鐙明禮典
傳家事徵書畏友生汾亭鼓琴意垂釣豈關情

姑蘇覽古

橐皋霸業愴威稜越絕書成感廢興萬嶺風煙趨笠澤三
吳春水下松陵空餘故苑眠垂柳不見前溪唱采菱惆悵
絲蕪槃郢墓跋陀行雨正飛騰

送僕荆南經歷之粵西

篔竹叢中水石淙應官聽鼓踏逢武昌行客今衰柳蠻
府參軍此大江陸賈舊通南粵使祝良新受九真降論功

絕嶠看銅柱浪泊威名振嶺瀧

彭雲鴻字夷鵠號儀菴甯都人優貢官義甯訓導有情

話編咄咄吟遠游草缺壺吟諸集

詩話儀菴詩多佳句五言如除夕云爆竹鄰山響梅
花草屋寒滯河晚望云亂樹迎帆轉飛星逆浪過野
晚影驚紅褪小鳥晴吟亂翠微守風野泊云天如狂
土少青眼浪與愁人俱白頭村夜云夜靜微聞田過
木村孤遙見火當門皆體物瀏亮氣格亦不減晚唐
過家兄牛城山巖遂陟冠石

愛汝無人境拳裳涉淺波雲霞儲廣谷日月側槃阿澗草
參差綠林鶯窈窕歌春山濃欲滴煙樹鬱嵯峨

依險築高垣一冠古製存山川藏粟里風俗辨桃源多難
思經世長歌竟閉門寒崖茶樹在舊業憶王孫

微生

微生率苟且卽事多謬誤青春去我早脫帽白髮露帶劍
出門來不識門前路

夢中立天地不測高與深帳中看日月不辨晴與陰帳中
與夢中疑盡今生心

送郭醉吟歸宣城

潞河酤酒趁斜曛柳暗花明兩岸分
萬里人歸燕市月千峯杖入敬亭雲
老諳世事都鷗跡閒啟柴門到鶴羣
不厭蕪田還種豆南山歌勝北山文

寄萬芝堂懷柔

竹屋蕭疏簇短籬解衣歸卧碧山陲
人生那易驕貧賤我輩何當遠別離
塞草深官路失江湖天闊雁行遲
重陽風雨愁分手落絮飛花又一時

步溪上

灘迴石側不容槎密篠連雲夾岸斜只恐漁人知隱處沿
溪不肯種桃花

汪勣字輦雲一字迂行武甯人優貢官吉水訓導有魚
亭集

詩話輦雲詩名甚噪擬古有古意近體多清越之音
早與蔣心餘揚子載齊名其才不特非心餘之匹視
子載亦較弱韻致固自不減

關山行

關山秋草風蕭瑟戍角悲笳聽不得月照征人望遠心霜
吹暮馬蒼黃色黃雲黯黯沒金微萬里無人一雁飛故鄉
此夜寒砧淚盡入沙場戰士衣

古意

朝陽入洞房春氣吹花暝一心託明鏡照人光不滿三歲
刺雙鸞神態盡委婉宵辭鍼綫勞而使華翎短

江南秋月多江北秋風早不悲秋夜寒獨悲客心老昨夜
夢魂中見君顏色好妾本薄命人顛顛安足道

斯園留別雷東甫正甫

雞黍樂高會行人多遠思策車當此別前路復何之礪水
有歸日山雲無盡時板橋難竟度心在綠楊枝
君歌梁甫吟忽感別離心客子雨中望春山雲外深前村
生野水遠樹息飛禽欲去還回首相期是德音

調琴引

玉虛光薄釵頭冷秋雨秋風弦上緊十指躊躇鳳不飛螭
蛄聲咽芙蓉醒金徽無語歌未穩相思滿鏡凋鉛粉暮雲

寒破出高庭五更一樹秋紅隕

湘靈曲和子載韻

湘娥一夕淚化作千年雨風吹洞庭秋月照香蘭語渺渺
白波生神弦咽靈緒元鶴立青松高唳刷癯羽蒼梧起素
雲帝子游何許夜夜鼓瑟聲愁殺江頭女

胡鈇字靜菴秦安人貢生官高臺訓導有靜菴詩鈔

蘇武故里

月如霜天如洗雞鳴天曉行人起長安古道何莽蒼道旁
大書蘇武里蘇武禿節單于營垂老甫得歸神京麟閣諸
俊何崢嶸幸附驥尾猶稱榮千古咄嗟李少卿送君河梁
淚滿纓家室灰滅聲名併隴西故居橫棘荆縱復標識甯
爲旌慎哉男子毋偷生

送徐二拓之平番

健於天馬瘦於鶴淋漓翰墨時有作徐君少日稱才人揮
毫得句何清新狂甚不作魯儒態七年恨迹來西秦近者
斂才歸雅正高格雅調學王孟昔如春卉爭妖妍今如喬
木鬱蒼然又似秋空望遠水平沙斷岸羅輕煙嗟予短淺
無所似傲弄詼嘲爲長技君也謂可與談詩唱和奚管吹
簫篪行吟坐嘯與戲劇碁局酒棊相追隨歡娛未極復惆
悵別予徑行西塞上西塞莽蕩予曾游黃河源連青海頭
此去登高俯大漠脫幘橫槊眞風流到日儻能遣健足急
須寄示涼州曲

懷遠縣

百仞懸崖上危樓望杳冥城連晚雲黑天近午煙青設險

通傳箭憑高勝建瓴防邊甯藉此烽火已全停

卽事

曉煙無力趁東風十里村原半欲空春色不知人世事柳
絲新綠杏新紅

秋日雨後獨步

遠思如夢復如煙獨對秋空一惘然處處芳塵迷定處年
年冷雨送華年停雲不解陶潛恨枯樹猶蒙庾信憐若是
三生曾有約真從石畔問前緣

張如焯字映壁觀城人貢生官蓬萊訓導有松園集

夜過夢溪

南來夜夜還家夢行到夢溪不見溪漏盡更殘眠未定林
間時有子規啼

張開東字賓賜號白菴蒲圻人諸生官蘄水訓導有海

岳集白菴詩集

宿黃州見友人遺橐

野航橫赤壁斜日下烏林天地風雲靜關河草木深故人
千里夢文字百年心岑寂江皋夜悲歌雜醉吟

過潛沔

野花無數亂飄零空屋都成水上萍惟有隄邊楊柳色秋
風猶向路人青

金忠誼字古還號硯雲仁和人候選布政司經歷

詩話硯雲爲檜門總憲子富藏書蓄古泉幣嘗纂古
泉考手拓泉文而幕俱備自題入絕有句云凝頑不
解趨時尙舍卻新錢換舊錢又刻
明人說部十餘種爲硯雲甲乙編

題胡菊圃重蒹葭話舊圖

西溪窈且深乃在山之麓伊人結同心面流構茅屋秋水
助微吟山月待宵讀一旦躡雲梯雙清贖梅竹寥寥六十
秋勝事指樵牧今披尺幅圖風流忽在目不惜買山錢相
約緣俱宿他時鼓棹來蘆渚傾醅醪

曹煥字乃文號瘦山嘉善人貢生候選州同

懷秋門乍浦

聚感鷗羣散感萍玉簫聲咽不堪聽故人忽寄新題句直
補淮南相鶴經

晚晴簃詩匯卷八十五終

晚晴蓼詩匯卷八十六目錄

馮祝 三首

張會 六首

顧于觀 四首

黃標 六首

張錫祚 四首

蔣業鼎 二首

張大受 三首

江昱 五首

陳深 二首

顧成志 二首

葉舟 二首

程之鷓 三首

李薊 二首

程兆熊 三首

陸炳 三首

金玉鳴 一首

曹相川 一首

鄒漪 一首

袁景輅 八首

張岡 四首

程芳銘 四首

劉夢熊 二首

王廷魁 二首

薛龍光 二首

黃振 三首

王玖 一首

施鴻勳 二首

楊法 三首

張夢喈 一首

顧甦 一首

高景光 二首

趙曉榮 一首

顧鴻志 一首

鮑岡 一首

王元文 一首

桂心堂 二首

王鼎 二首

張琦 二首

陳毅 三首

周琳 一首

張自坤 二首

晚晴簃詩匯卷八十六

徐世昌

馮祝字古浦號欄堂婁縣人有一椽居詩橐

詩話古浦布衣工詩晚歲客游居鄂文端幕最久其
馬龍九日詩有萸菊三年驚鬢老桑榆萬里幸身強
句歸隱年八十四卒吳省
蘭刻其詩於藝海珠塵中

次和鄂制府紅優曇花

宛對瞿曇座拈來見夙因蘊空仍有色示現豈無神品淨
心方潔香凝妙絕塵塗脂非慶喜須識鬢華身

獨秀峯在桂林城內貢院後旁無培塿坡陀特起如
浮屠登其顛俯矚院中時假爲制府行館上元前
後於峯之上下張鐙設燕此粵西僅見之盛事也

獨秀峯高壓暮煙六鼇齊駕繞諸天長春國傍星輶起不

夜城瞻斗極懸藻火爭輝排繡闥燭龍銜耀照華筵已將
聖澤開生面百粵風光拱萬年

雲塘晚步同湘皋巢雲

聯步尋幽處雲塘細路偏空山無俗客野水自涓然原隰
千家望松杉幾鳴連有亭堪眺賞徒倚夕陽前

張會字祖武一字組五丹徒人有石帆山人集

詩話祖武自號石帆山人不習舉子業以詩游歸愚
之門當時推與鮑步江齊名英夢堂相國官鎮江時
提倡風雅步江石帆同爲上客石帆後游京師客相
國邸又數年落拓不偶相國贈詩有依人久識孤王
粲之句法梧門論鮑張二人詩謂石帆之煙鳥去無
盡風潮來不知與步江之山光終夜騰海氣不時秋
寫焦山景皆確切不移石帆集中歲除前二日同步
江登木末樓有句云歲臘共驚三日盡江山如待雨
人看尤足見其自負

夜過平望同陳東峙作

冒雨理歸楫披衣坐晚寒
鴈聲兩岸急人語一鐙殘
此夜追歡好重來把臂難
忽聞漁唱起鷗鳥下沙灘

兩宿焦山

巖光驚早起江閣雨殘時
煙鳥去無盡風潮來不知
櫻桃分餉客芍藥對題詩
四月山中好幽禽莫負期

五州山

蘿磴上空際禪房深翠微
崖陰春不到松澗雨常飛
落葉埋樵履寒雲戀衲衣
五州遙極目幾點散煙霏

登凌雲亭

水光秋變白石骨冷逾青
天地能容我江山著此亭
沙沈尋折戟酒盡棄空罇
日暮悲歌起蛟龍不解聽

丁卯橋

詩名直到今橋斷蹟難尋落日人獨立春風鳥一吟徑幽
蒼靄積石絕碧苔侵惟有溪旁水年年自賞音

步江同紫芝焦山讀書寄懷

九月焦巖已薄寒海門高處落風湍秋聲一夜客同聽山
色滿江人獨看燒葉照書蠅舍好剜苔讀字鶴銘殘遙憐
鐙火三更雨清磬泠泠度遠灘

顧于觀字萬峯號澥陸興化人諸生有澥陸詩鈔

詩話萬峯精書法與李復堂鄭板橋友善數奇不偶
刻意爲詩縱其才力之所至而馳驅就範流麗雄超
不落窠臼

京口曉望

萬戶沈蒼靄鳴雞出翠微江聲自流轉秋色靜依稀海日
千峯出吳船一棹飛東南形勝地蕭爽有餘暉

北極閣

鍾陵積秀邈霏微
北極臺高山四圍
樹底人家蒼翠合
雲間樓閣亂紅飛
湖煙北望迷春草
江勢西來捲夕暉
下去玉階承輦處
牧兒橫笛打牛歸

婺州試院後有宋皇子魏王節度使碑院故節度使第

立傍殘陽看古碑
雙松殿角隱蛟螭
河山一去成千古
笙鶴重來是幾時
複道雲深迷客屐
叢篁春盡老孫枝
浮圖空外聞鈴語
瑣院庭閒月上遲

長橋

長橋跨通川
明星動川底
風吹橋上人
雲隨衣帶起

黃標字紀堂揚州人諸生有紀堂詩集

詩話紀堂謂生遭聖明白首不見兵革無驚霜泣露
悲風淪月之詞草莽處士無越分以涉清廟明堂之
句老死不出鄉里終其身無遷謫之憂江湖之役惟
安居樂業日求同輩徵歌博飲以養其天年故其詩
不爲無病之呻意境雖淺時見天真

重過長千里有感

兩經霜露動深哀况聽秋聲木末來江上重尋鷗鷺侶雨
中復上鳳凰臺千家古里連青陌六代遺宮長碧苔此日
登臨多感處百年懷抱一時開

金山樂閑上人山房卽事

似泛蓬壺萬頃平凌虛畫閣接層楹雙鑪石乳壺中液一
榻江流枕上聲留座自慚無玉帶設餐多謝剝金橙與公
應有三生約他日雲山是主盟

游西溪寺

帆落秋溪水人登夕照山古亭穿竹徑勝地入松灣石潤
雲猶溼花深鳥自閑老僧知好客煮茗未容還

過鐵佛寺懷古

爲探幽意過西郭古寺曾聞此地偏黃葉路深埋斷碣黑
雲兵盡散荒煙當年淮右雄藩鎮今日吳宮拱墓田憑眺
不堪惆悵處半林疎影石壇邊

雨中泛舟登尺五樓

密雲低垂覆四天平湖水滿春放船青簾白舫蕩波出干
縷萬縷楊柳煙柳畔朱樓聳翠碧飄渺直踞松雲巔主人
欲住不可住郭巾謝屐紛後先我欲括衣尋箬笠拍手笑
殺蘇子瞻風淅淅溜懸懸繡爐綺棟凌飛仙爲君躡足探
雨窟雨中花嶼于枝然雲漠漠水漣漣我昔畫舫聽雨眠

豬紅熊白泛春釀此景不再幾十年會當更趁迎梅雨解
盡杖頭沽酒錢

送許巢余禮耕游攝山

聞道先生買桂舟片帆風發水西洲金繩世界千華曉玉
鏡山川萬葉秋好句徧題王粲筆清樽羣奉謝公游遙知
煙月空濛夜人在蚪龍最上頭

張錫祚字偕行一字永夫吳縣人有啖蔗軒詩鋤茅遺
藁

重九後溪南采杞菊

佳節倏復過寒商激林杪霜清杜若洲花發蒹葭島空庭
無嘉卉何以慰幽抱緣源路轉迴穿林人漸少朱實披榛
叢黃花掇香草尋異心無厭適己物逾好卽此俗慮遺迨

遙可忘老

訪沈石田故居

抗心希古賢閒情緬高士孤舟渡平湖日落遵枉渚逶迤
入荒村徘徊覓遺址人語散鳧鷖草長眠鹿豕何處有衡
門田中間孫子

謁韋刺史祠

平生輕吏舍祠宇傍宮牆誰載花林酒來分畫戟香道心
棲野寺詩思冷秋塘日暮瞻遺像斜陽正滿堂

過盧老人鶴園

閒日窮幽賞行行過水田竹籬遮老屋花氣散晴川曠野
無車馬斯人得醉眠何曾謀鶴食四壁正蕭然

蔣業鼎字升梅長洲人諸生

詩話升梅風流好事年未三十而歿其祖樹存營築
續谷於桃花塢園林佳勝康熙己卯約送春之會座
中尤西堂年入十餘沈歸愚甫逾冠皆有詩王石谷
畫長卷紀事至乾隆己卯歸愚年八十七升梅復會
名流廿餘人王存棟復爲之圖又名妓張憶娘爲顧
俠君惠半農所眷樹存曾作簪花圖升梅出屬座客
題詞吳中
傳爲嘉話

寒夜

寒風發清響木葉忽紛飛
微月澹樵徑疏煙生竹扉
隔林深犬吠遠寺夜僧歸
閒步尋幽興相于擬息機

送王蘭泉先生歸里

尊鱸歸思滿吳淞
渺渺江雲隔幾重
畫舫柳垂春鬪酒香
林梅發曉攔笳暮潮
雨歇過三泖明月煙
深到五茸何日更來
尋舊約寒山同聽夕
陽鐘

張大受字若谷一字可之號蔚園常熟人諸生有蔚園

詩鈔

詩話若谷著述有毛詩翼注黃河圖說讀儀禮地暨其他詩文數十百篇炬於火隄於盜十存二三零落可憫

過釣臺作

炎祚重開累故人青山獨往得閒身
帝方卧榻容酣睡客自披裘愛隱淪
中古巢由非異事東京風節播清塵
江流千載澄空碧不負先生舊釣綸

重過蘆溝橋

羣峯西連太行起一水東注滄溟開
神京門戶重襟帶長虹跨空勢壯哉
千輪萬蹕日來往此中榮悴分霄壤
名利驅人不覺停消磨磬石平如掌
無端我亦到京國重過應嗟題柱客
愛看形勝更徘徊曉風殘月他時憶

桐廬

縣小渾成市山多半入雲空江煙雨裏何處問桐君

江昱字賓谷號松泉江都人諸生有松泉詩集

大禹開山幣歌

開山幣自神禹遺斑駁疑帶衡華泥幕文表役古僅見隨
刊想見躬胼胝此時司空初升石夷野考代當屬虞帝制
卅九鼎淪亡法物盡寸銅足寶參敦彝荆揚貢金錯三品
八年帑給先不貲或言太公始勅九府法得無好事矜贖
私不知泉貝之利肇已久洪範食貨疇衍箕禹采厯山著
典籍讀書不到徒多疑堇舛鑄文緬在昔况值帝終王始
風會移懋遷有無類粟帛安能交易通毫釐奏庶艱鮮暨
益稷肯憑威令奔窮黎靈異或稱黃龍應龍助烈焚亦非

一手一足支將建平成地天績區區豈恃公旬期若論爲
民用民力後何當逸前何疲舟車樞樞急已竭偉義非可
繩蚩蚩後世動眾急鼙鼓水衡錢亦專所司本乎人情乃
王道漫云不距先祇台摩挲鎮日增叅歛蚩氏明德遙堪
追聖神所作定有赫厭火應敵响樓碑川澤山林佩以入
神奸不若紛遠離要之至寶不論用所貴卽物能見德叶
直爲萬世作表式珍重勿替同元圭

正月五日集唐石士柳巷新宅以楊誠齋五日詩印

我青鞵第一痕分韻得我字

居愛柳巷名不見柳婀娜應如青白楊住蕭脊何妥主人
頻年出館于淮陰傳座喜招我氣和風日閒生槃樂笑瑳

簾戶爭春新瓶梅紅欲哆并州此故鄉家山榜檐左石士

人以其鄉山題所

居曰五華山房

門臨小秦淮水生促行舸

又將往淮暫聚聊

盡歡苦吟譏飯顆

是日香溪欲以誠齋句爲韻人各七首衆不果從

買書限韻

積書儼足國生聚富稻蠲但得萬軸藏何惜千金解紅牙
插縱橫青氎坐瀟灑查檢走小胥編題付阿買案蟬乾苦
勤漆椀搬笑駮願充肩經郎免作觀場矮攜紙借異本懷
餅鈔細楷恐類春明坊賃屋錢漸夥

辛未臘月香溪先生爲題擁書圖次韻奉酬

擁書不讀徒百城蓄酒不醉以酒名忍貧遠媿古人守閉
門吟出饑鳶聲新詩似嘲困蹇東是愛非嫉若治禿淮南子親
母治禿血流滿耳過者以爲愛也使其繼母則必以爲嫉矣囊錢旣誤書亦荒尙要空
券入場屋文同詩場屋聲名四十年五車書誤一囊錢

過雁落山莊有感寄舍弟衡州

桐柳蕭條門井傾重來江令不勝情一家骨肉分微祿兩
世松楸託友生村塾年饑荒短學疲農病起事冬耕藍田
縱使他時共白髮應憐弟與兄

陳深字壑淙丹徒人

詩話英夢堂相國官鎮江同知時提唱風雅
壑淙與鮑海門張石帆輩皆壇坫中眉目也

秋日過象山洞

秋來心跡戀江湖山閣秋心病強扶鯨背斷雲飛塔湧鳥
邊斜日峭帆孤可憐落木思公子一任悲歌逐酒徒誰復
登高能賦者參軍才已擅冰壺

初春英公夢堂招同張墨岑張曉村鮑海門張石帆

焦巖雅集

海國披襟過雨初尊開山閣曉鐘餘潛蛟抱凍江濤靜老
鶴盤雲島木虛已分縱游忘吏隱况論高跡託樵漁知公
盛業滄洲在好出龍門自著書

顧成志字心勿太倉人諸生有治齋詩存

讀李客山先生武平分水坳定界記

鄙人漚營魯人怒筐篋爭桑構吳楚尙聞六里作鴻溝彼
粵此閩闕如虎閩邑曰武平分連粵平遠城天子頗聞粵人
橫負眾侵疆狎縣令詔書特敕兩銅章判以溝涂毋力競
武平許君氣何豪單輅來會分水坳卻聞隱隱鳴鉦鼓忽
見青紅旗亂舞車中一笑此何爲回頭從者色如土野雲
黯黯日將落脫轄呼人無一諾獨揮羽扇抗羣咻風馳雲
合圍戈矛桓桓許君神色定親把輿圖作明證健兒突入

欲甘心拉虎批熊隻手勝是時許君起大呼么麼鼠子敢
犯吾揮刀折齒前令胡吾能殺汝如腐雞廣福橋頭故吾
土赫赫鬼神可欺乎朝廷威行九州外爾等跳踉行盡屠
萬夫垂頭齒打舌旗捲槍拋各求穴鞠躬謝罪辭伊嚶彼
何人哉平遠侯立石巍然峙坳頭我疆爾界標千秋吾聞
汾陽王入鹵惟單騎昌黎書生耳鎮州強不避爲國焉能
更愛身渾身是膽發乎義懦夫畏賊掩耳奔不惜巾幗羞
三軍天下英雄竟誰是千載而下乃見今許君許君老友
曰李子慨然奮筆識終始發難能令壯士驚折衝足雪鰈
生恥此事此辭炳日星我欲大書千本與萬本張之凡百
有位庭

蘭芽雲吟山房作

素心渺何許不見一年矣春風落階前陳根發泥底有如
思故人忽得書一紙感此芳訊難欣然願覲止敷榮不求
媚遲遲若有俟煩爾種花翁晨夕候之子

葉舟字布颿江都人有石林草堂詩存

歸朱老匏先生墓碣

莽莽荒原生野煙橋邊識碣總前緣披荆尋入亂墳裏把
卷放歌斜照前

時汪蘇伯謙先生自輓詩以當誄文

七字幾枯殘淚滴一抔

翻仗故人憐

墓碣係高西唐入分書側鐫宋默夫七律一首

招魂此地餘詩骨瑟

縮寒風吹紙錢

觀禹廟壁間所塑山海經圖像

淮海維揚古澤國浮山作鎮傳非惑禹廟恢張嘉靖間殿
陸崢嶸傍山側我家舊任郡之東偶來瞻拜思神功壁間

山海設圖像雕泥鑿木何搜窮其間似獸非獸人非人有羽有介有鬼神首自招搖貌獸族如禺耳白名狴狴此類奇形共五十滿壁詫訝徒續紛次及羽禽始鵠鵠二十二種形狀殊六目六足三首翼卽此可以觀其餘更及旋龜計鱗介鳥頭虺尾吁足怪此類分形又三十在水在山各殊界神祇拉雜其中列鳥獸鱗介無分別若者險阻助功成若者戰鬪遭鋒鉞驚看異域更奇絕少見多怪難爲說或長九寸十丈餘或爲獸體或爲魚或止半背或數首胸生洞穴穿其軀予齒去角不足據付翼之說徒爲拘輾轉徘徊兩廡庠依經塑立原非假當年洪水橫流時異類紛紜徧天下萬古生民仰禹功請看四壁塗丹赭

程之鷓字羽宸又字采山歙縣人貢生有練江詩鈔

黃山登光明頂

山心高望四無極，迴合煙嵐恣登陟。六六峯推一一奇，到此輪靈咸效職。蓮花如幕列侍臣，洞中待漏光常黑。老人天外進硃砂，多自軒轅臺畔得。翔舞青鸞報喜音，歌爲上壽丹書勒。西走獅子東飛龍，吼號天矯憑封勅。惟有天都稍與齊，九百仞餘通氣息。他如羅列實附庸，北挹雲門對南直。我欲長呼絕頂間，摩挲頸項天風拭。惆悵眞仙招不來，容成陳迹浮邱匿。昂藏磊落丈夫身，何用吞霞飲灑力。掉頭返照迫蒼黃，巘岈倏變金翠色。朝天萬笏晚朝開，此卽中天一海國。

泛東仇游張公洞

破曙凌蒼煙，片帆東仇指。蒲葦散鳧鷖，蓼蘋跳儵鯉。五雲

擅荆南罨畫茶煙起行行日卓午循麓蜀山抵甕牖丁山
來車載搗泥紫湖汊取次到捨舟巖壑裏孤杖眾同行披
莽臨山趾先從後洞窺小口磬同擬延步幾遂巡冷風洞
中起鮒背聞滑油窄不易容跬前洞旋復登敞深一門啟
琪林樹蔽虧層疊石魄礪霧氣洞底橫一白渾疑水瞪睇
下層崖玉柱排銀齒蹇然石燕飛撲漉翻不已石牀辨模
糊石竈火熄矣石髓滴琤琤天然乳結藥須臾迫日暮亟
欲回仙履尙有後客來相待同徙倚從來神仙窟往往足
至理豹變難窺全管見詎測蠡留取待芳春恣游窮復始

庚申七日

今夕何夕是巧夕愛說人間七月七瓜果筵陳事綺羅飄
香嬌妮妝樓側對月臨風鍼綫多五色縷穿九孔隙天家

會合正團圓那許人間餘巧乞我愧無書腹曝庭空負亭
午當空日千里鄉心又隔年女牛亦笑人離別銀河昨夜
經雨餘鵲路塵清更如滌還訪君平賣卜人靈槎重覓支
機石

李勉字嘯村懷甯人諸生有嘯村近體詩選

詩話嘯村以詩爲諸侯客從盧雅雨游既卒
雅雨爲刻其遺藁專選近體蓋取其所長也

焦山

別開生面水爲鄰風鼓煙鐘澤國春海底勒銘猶有石山
中卻聘更無人浪攻彼岸千層雪樹辟浮圖十丈塵不共
滄桑容易變請看周鼎至今新

早起

不待雞鳴起披衣正覺寒佛通花智慧人與竹平安霜氣

撲簾重鐘聲出檻殘伊蒲香積滿早已辦朝餐

程兆熊字隱磻丹徒人有燥雪吟卷

詩話隱磻詩有晚唐風格嘗與其外舅張石帆韓京口遺音集而未成有志感詩入首標舉眉目韻致不減漁洋論詩絕句後張寄樵王柳村繼之乃減涼江耆舊集

苦雨

隘巷春風少蓬門細雨多病增愁母覺酒盡愧朋過短髮
輸芳草流光逐逝波自慚生計拙終歲任蹉跎

早春送殷芷溪返吳門

柳色初黃花未飛春光正好又言歸客囊羞澀惟詩卷故
里荒涼墮竹扉廡下賃春身欲老江邊把釣事全非可知
去住皆無著莫怪臨歧淚共揮

柳青橋訪潘江如先生故居

高士淪亡久書堂賸落暉空憐芳草路祇有白鷗飛悵望
春江晚蕭條過客稀年年橋畔柳猶自拂人衣

陸炳字赤南號藜軒丹陽人有劍囊草

獨酌

迢遞雲歸山徘徊日沈閣鳥還月漸明空庭何寂寞客思
苦無聊銜杯成獨酌酒狂起欲舞拔劍搖霜鋸意氣如河
山平生重一諾如何反覆情大義同糟粕棄置勿復言貧
當甘藜藿

晴川

晴川書觸目亭午水波明舟疾驅山走雲遲礙日行石苔
齊草色岸竹聚風聲惟是尋幽處由來世莫爭

寄茂州張左虛使君

離情何所極滿眼盡關山芳草通千里孤城繞百蠻功名
邊地遠心事鬢毛斑雨露春應足無愁鏡裏顏

金玉鳴字虛船號曙岑江南山陽人諸生有尺厓片草

秋夜

金風夜起暑初收吹散繁星大火流河漢晴連三島月梧
桐雨洗一天秋楚坡冷落枚臬宅長笛依稀趙嘏樓獨宿
聽殘宵漏永詩成枕上暫消愁

曹相川字岱芝號鎔齋金山人諸生

不寐

宵短難成夢堂虛易受風吟蟻來遠近飢鼠過西東百行
脩成道三餐逼作翁側身天地闊又見曙光紅

鄒漪字棹煙號嘯軒常熟人

晚眺

木落洞庭晚蕭蕭滿地秋冷雲橫古寺寒月逼江樓菊瘦
還簪帽鱸肥恰上鉤平沙飛雁下莫作稻粱謀

袁景輅字質中號樸村震澤人貢生有小桐廬詩鈔

詩話質中學詩於歸愚與王北溪元文顯蘇雲汝龍
諸子結竹溪詩社搜集國朝詩家爲松陵詩徵二十
卷甫卒業而歿年僅四十四歸愚序其詩稱許甚至
近於溢美但能謹守唐人矩矱清婉處自不可及

宿藏雲閣

白雲滿空山小閣不知處我再入雲中閣上雲來去松柏
繞山青泉聲隔林樹此時身與心一一煙霞趣欲去仍此
宿白雲留我住

登雲巖寺浮圖

平曠聳孤峯古木影交翳山巔塔玲瓏高湧出雲際茲山

多樓臺陟高目無蔽遙山數點青秋色滿天地吳都百萬
家一綫圍埤坵千里顧盼間勝概無與儷游者自崖反曠
懷此獨契坐待明月來風鈴遠搖曳

登羅星洲文昌閣

春光無近遠往往在僧寺地靜心亦清寓目皆生意小閣
水中央四顧臨無地纖鱗戲萍末初鳥鳴天際波濤擁新
色雲巒落空翠一一閣中景盡洩三春祕登覽曠心神余
懷此獨契

九日古愚丈易門蔚雲芝房東巖家竹軒愛吟齋小
飲并結竹溪吟社以菊花開日卽重陽爲韻得卽
字

雁過白雲冷木落遙山碧游筇懶不攜良友近可卽平地

當登高少長集吟室有酒期共飲歡焉布瑤席座無拘忌
流醉醒取各適襟情未必同臭味自不隔古人師與友所
重均受益後世務面交毀譽亂曲直攻玉藉他山引鍼賴
磁石各勉百年身磨礪互盡力是時日欲暮寒光動西壁
照見座中人各有好顏色聚首苦不常歡飲忘主客相期
敦久要觴詠繼今夕

夢與蔚雲芝房東巖同游羅星洲賦詩題壁覺後忘
後半因足成之呈三君

方蓬樓閣水中央與客登臨共野航一鏡空明涵遠近幾
村煙火入蒼茫夢中杯酒聯新句覺後雲山各一方遙憶
殘鐙孤館裏可能有夢到江鄉

泛舟至雷峯復度嶺憩淨慈寺

山靈久我待既見不可緩舍館且莫定呼舟任游衍風便
向南湖斷塔聳遙巘漸近益崇高頂樹紛可辨風送南屏
鐘引我足逾健出雲復入雲上阪更下阪古寺隱湖出路
轉忽到眼殿角干青霄丈六金光滿更披虞集碑宣揚仗
軒冕憩坐息筇杖松風冷然善山頂暮樵歸背負斜陽晚
一徑通四山可近亦可遠我欲往從之白雲忽遮斷

紫雲洞

洞天猶數武清風逼人冷既進訝然開塵煩先自屏巖隙
透天光仰望疑坐井旁穴穿地底窅然落深迴平進可深
達曲折通後嶺同行戒後怯有志鼓前猛中路苦偈仄蟻
進步難併輾轉又宏敞夷險判俄頃更深趾不受隱隱路
脩永空響幻波濤白晝半昏冥坐久心骨寒復出來時境

此集卷八十一
人生煩熱胸到此須一省六月斷炎暑重來煮新茗

丁家山

連岡如羣龍一氣陡入水飲湖湖不乾忽又昂首起遠望
既聳峭近睇亦秀美雖臨一角湖塵喧不謀耳登高望平
田傍水成疆理遠林露茅屋時來荷鋤子奇石森綠蕉更
列牀與几何當一曲琴坐待月來此

張岡字崑南號古樵長州人有鶴健廬集

晚至聖恩寺宿四宜堂

暮隨白雲至山月尙未出言尋石門幽谷口煙蘿密欣逢
採樵人招我入禪室曇花空外香石榴巖下急虛堂面五
湖碧動軒窗色浮生疲津梁茲焉偶棲息聞鐘寒不眠風
竹聲蕭瑟

歲暮送友人之吳興

復作茗溪別依依歧路間斜陽孤櫂客晴雪五湖山逝水
看東去冥鴻聽北還天涯當歲暮想像鬢毛斑

登堯峯作

夙昔聞堯峯游心歲已積杪春羣物秀及茲事清適路轉
峯西偏蕭條但松石飛泉若風雨淙淙下絕壁向晚猿鳥
嘯時還見樵客緬彼五湖水東逝自古昔煙波碧如此人
事幾更易請從支遁流空山共禪寂

秋夜雨中集企晉園中卽席感懷亡友亦瑜

秋暝松窗鐙火虛故人清宴子雲廬嘒殘林鳥空山靜落
盡汀蘭暮雨疎對酒尙吟思舊賦論懷休擬絕交書相逢
盡是江潭侶重向秋風問索居

程芳銘字新一字滌軒寶山人諸生有一枝樓吟草

玉山草堂歌

楊柳蕭疎拂綺窗芙蓉爛漫開秋江涼月娟娟露華白漁
歌欸乃歌輕艫玉缸香泛流霞席搗箏小伎來迎客素手
高擎鸚鵡杯朱唇低按霓裳拍此時月色明秋河蕪澤微
聞酒更多麻箋已度花游曲蒼玉重翻鐵笛歌紀昔流傳
玉山第舞榭歌樓綿藻麗更築幽居號草堂奇禽珍玩開
清閣桐帽棕鞋去不還餘錢買郭惟青山鴛鴦彈盡驪駒
曲鴻鴻空棲流水灣幾年佳處題名改舊址猶留玉峯在
賜第新開菘竹堂忠貞並入青編載三百年來憶勝游漁
莊臺榭成墟邱芙蓉落盡紅顏色楊柳飄殘過客愁馬鞍
山前十里路禾黍秋風起煙霧學士徒瞻顧相祠行人但

識歸公墓文莊舊宅已蒼涼鄭氏園林亦久荒茜涇西望
界溪水湘湖雲樹俱茫茫

擬登泰山懷古

神房阿閣訝然開玉策金函訪道來不是秦皇能羽化豈
知漢帝有仙才燕齊怪士空聞語遼海仙人候不回自是
鼎湖龍去杳山形終古隔蓬萊

少年行

玉勒金羈百萬錢五陵車騎日翩翩樂游原畔爭相問一
曲胡姬酒肆眠

銅雀臺

漳水東流去不回繡緯寂寞鳥嘯哀夕陽一片西陵土曾
見宮人歌吹來

劉夢熊字坦茵號蕙圃丹徒人有蕙圃寄吟

月夜南樓漫興

月出江南好山光浸碧流平生多古意第一在高樓天遠
人何處高懷我欲秋不關情思迴身世久浮鷗

哭鮑海門

組綬翻嫌近釣名羨君綺歲句從衡玲瓏玉鏤窗前色飄
渺蕭傳海上聲逐鹿中原輕秀水爭袍內苑藐新城少微
星隕詩篇在萬古江河對月明

王廷魁字岡齡號盤溪吳縣人諸生有小停雲館吟橐
登天平山

何年巧斲龍門路側身石縫迷窘步分明從此隔人間梯
空仄磴穿雲霧探奇髣髴達天都松花飄落來虛無銀房

石室隱崖谷山茶活火然僧鑪白雲冉冉自來去半嶺鐘
傳泉落處鮮葩錯雜吐幽香梵宇凌空接仙馭披襟直上
最高巔下瞰萬笏浮春煙湖光浩渺望不極琉璃倒映丹
霞天

題陸野塘高士松陵八景

昔賢觴詠地展卷認幽棲人領天隨趣家臨震澤西夕陽
帆影亂秋水雁行低便擬鱸鄉去行吟續舊題

薛龍光字少文上海人有酌雅堂詩

野泊

日落煙蒼茫停舟傍野渡繁星溼春江殘鐙隱孤戍夢破
柔艣聲寒宵自來去

垂虹道中

夕陽紫靄濃萬頃浸秋容帆出渚中渚雲歸峯上峯鱸鄉
老自好橘社逝相從幾兩人生屐休辜六尺笱

黃振字舒安號瘦石如皋人有黃瘦石橐

古澹園

一徑秋陰向晚天小園緩步意蕭然水衣綠破崩崖底霜
果紅敲落葉邊屋倒祠堂留古像人亡臺榭剩荒煙亦知
名勝終難久太息何曾有百年

送王春明十二歸錫山

秋深黃葉裏人去斷鴻邊落日低帆影鄉心隔水煙山寒
江上色詩澹世間緣好結臨厓屋觀書種秫田

羅兩峯來寓兩香精舍同片石梅原賦詩用臺字

兩香舊址有高臺自古登臨到此來千載文章秋鬼哭一

番鐘鼓斷鴻哀無端落葉因風聚何處寒雲向夕開我是
悲秋老詞客斜陽衰柳自徘徊

王玖字次峯號二癡常熟人諸生

詩話次峯爲石谷曾孫
畫守家派能世其傳

爲王蘭泉作三泖漁隱圖並題絕句

打槳入空明橫橋出秋嶼人在釣魚汀如聞隔煙語

施鴻勳字紹六長洲人貢生有功園詩鈔

太白酒樓和顧星橋韻

太白不可作猶存舊酒樓憑闌斜日淡放眼亂雲流鄉國

千山杳登臨萬象秋桐花題句後

星橋於殿前賦桐
一花詩欽定第一

寫新愁

梅花村訪浦鶴天

梅開深處卽孤山高卧柴門晝亦關踏破蒼苔人不見立
殘清影鶴初還尊中酒滿常拌醉驢背詩多卻費刪珍重
東君留素笑漫勞驛使一枝攀

楊法字孝父又字已軍號石成江甯人

飲鄰家作

一雨八九日未嘗出門戶今日天氣佳迺向鄰家去主人
能清靜養心借章句落落寡所諧喜我來相顧旣盡賓主
歡頗得酒中趣物我跡俱泯何思復何慮卻愛古之人醉
鄉卽長住

題于野種山亭

曲巷深藏屋空庭白晝閒書殘老樹下心澹菊華間聞說
多幽事秋來夢種山信知邱壑僻寤寐亦相關

咫尺幽奇境青鞵不厭過一庭堆落葉雙樹靜交柯坐久
疑空谷看雲覆女蘿側身天地外歲月任消磨

張夢喈字鳳于號玉壘江南華亭人諸生有塔射園詩

鈔

雨不止

四野人聲靜惟聞檐瀑喧窗捎花影重徑壓竹枝繁伏枕
宵猶歲攤書晝已昏何時步邱壑策杖倚朝暾

顧甦字瞻麓吳江人

雜興

睡味甜於蜜詩情冷似冰養疴先斷酒愛寂并疎僧花落
從風掃窗虛見月升吾廬誰共此靜對一枯藤

高景光字同春元和人諸生有桐村小草

懷曹劍亭

京華六載別風度杳難攀
日下魚書斷天邊鷗夢閒
春帆黃歇浦秋色陸機山
何自攜尊酒相從一解顏

訪劉伴霞鍊師不值

擬親古鏡照心心來訪
仙人紫府深紅棧青岑
凹凸畫雲衣月幌短長吟
叩門穩卧松間鹿放艇空
張花下琴兩到山中不相見
臨風搔首憶劉沈

趙曉榮字陟庭嘉定人諸生有屬古山房詩鈔

滄浪亭

佳憩高秋得孤亭曲徑通
喚人空鳥語照眼自霜叢
古寺寒煙裏遙山夕照中
緬懷蘇長史明月與清風

顧鴻志字學遜奉賢人諸生有遜齋學古初編

寄凌叔子

歲宴山中桂樹枯，思君渺渺海雲孤。
春生驛路花開未，雪浣征衫雁到無。
才子京華愁旅食，散人笠屐隱江湖。
誰憐水國三千里，煙水蒼茫一釣徒。

鮑岡字雲策常熟人

憶棹煙

雙屐久不來，花徑莓苔長薄霧。
暝前村春泉落，清響好懷誰共言。
枯坐靜塵想，不知修竹間。
朗然明月上。

王元文字畢會號北溪吳江人諸生有北溪集

東巖別後有憶

相晤了忘情，相別還增慮。
入暮獨登樓，幽懷澹無豫。
遙憶煙雨中，孤舟泊何處。

桂心堂字苧眉上海人諸生有杏花書屋詩藁

棉田薙草行

東鄉土高宜植棉久雨草長青鋪氈田家婦女停織作趁
晴盡出芸中田田在草間草沒踝赤日行天烈於火手不
停鋤汗滿襟面目都化城中黔暮歸驚聞嘍徹戶呱呱待
哺兒飢苦哺兒更慮奉姑遲急入廚中煮粥糜彌月勞勞
心力計棉高漸見花鈴綴懸耜惟思弄機杼誰知及早完
秋稅

採蓮曲

風吹藕花滿路香中流蕩槳誰家娘隔岸愛尋雙菡萏迴
波驚起兩鴛鴦採得蓮心無所寄藕絲不斷繫人腸

王鼎字祖錫號香浦一號條山江南華亭人諸生有蘭

綺堂詩鈔

和張漁山憶秦淮春柳

多半春藏畫檻邊
酒醒人困絮飛天
生憐南國桃花漲
慣繫東風鴨嘴船
繡箔吹香邀燕舞
鈿箏彈怨惱鶯眠
板橋斜日依稀是
小別嬋娟又一年

泛舟太湖

雙帆翦破碧玻璃
秋色空濛望欲迷
七十二峯何處好
夕陽一角洞庭西

張琦字映山吳縣人有蒼雪山房集

詩話映山客畢弁山尚書幕中與孫淵如洪稚存諸公游詩無俗響詠老少年云是草獨無遲暮感不花能傲豔

陽時

雜興

本無軒冕志來結松下廬東皋微雨過願言事新畬開我
牀頭甕擷我園中蔬鶴鷄巢深林一枝不求餘但檢草木
疏而無貨殖書心不爲形役此樂誰能如

登攝山最高峯

初疑天際峯鳥飛不可度石磴幾盤旋忽到絕頂處漸覺
遠村低微茫隱煙樹長江拍雲來欲挾眾山去上方猶夕
陽干林黯將暮立久薄寒生客衣溼雲霧我生幸何如得
投靈境住心靜聞天香超然發深悟

陳毅字直方號古漁上元人有古漁詩概

曉過黃葉嶺

嶺頭孤店小一徑與山分曉日明高樹籃輿破白雲野花
村婦髻亂石古人墳黃葉初飛處秋聲不可聞

湖港阻風

刺骨寒風歎石尤煙波東望迴生愁早霜紅樹藏湖岸殘
日青山滿柁樓已覺空囊歸故里何因歧路感深秋思量
蹇滯平生事來去還應笑野鷗

懷蔣愚谷歸吳門

我聞蔣詡三年餘訪之未遇城南居昨叩松扉問童子言
向岫樓求神書蒼煙滿空暮色澹紅日下江天影虛太湖
七十二峯色登高不見生躊躇

周琳字定生吳縣人諸生有高山堂詩鈔

暮春游貝氏園

一徑穿林谷垂條冑角巾小亭浮樹杪古木卧溪濱花氣
能留客泉聲解送人恩恩理歸棹落日滿城闔

張自坤字此亭丹徒人監生有頤齋僅存草

秋夜凌江閣與年瘦生談往事

征西往事不堪論
淚點深宵劍有痕
九夏冰霜眞國士
卅年塵土舊公孫
綠車天上恩難再
短褐揚州道自尊
一語請君重勘卻
種瓜何必不青門

殘陽

殘陽淡餘影
縹緲煙鐘聲
偶爾竹林坐
不知溪月生
遠峯望中隱
空水吟邊明
撫絃不成弄
心神秋與清

晚晴縹緲詩匯卷八十六終